

TOLONIVM, alijs Telonium, de quo Notitia Imperij Romani, vulgò *Toulon*. *Cyprianus* huius Episcopus subscripsit Concilio Aurelianensi quarto, & *Palladius* Aurelianensi quinto.

ARAVSIO, Arausiorum colonia Ptol. lib. 2. cap. 10. vulgò *Orange*. *Constantinus* huius Episcopus nominatur inter Episcopos Galliae legatos ad Concilium Aquileiense missos, & *Florentius* subscripsit Epaonensi.

VASIO, Vasiolorum colonia Ptol. ibid. vulgò *Veson*. *Dafnus* Vasionensis subscripsit Concilio Arelateni primo, & *Auspicius* eiusdem urbis Episcopus fuit tempore Concilij in ea habiti.

DIA, Dea Vocontiorum Antonino in Itinerario, vulgò *Die*. *Seculatus* huius Episcopus subscripsit Concilio Epaonensi, & *Lucretius* Aurel. IV.

CIVITAS TRICASTINORVM Liuius lib. 1. Decad. 1. vulgò *S. Paul des trois Chasteaux*. Ex eius Episcopis *Florentius* subscripsit Concilio Epaonensi, & *Heraclius* Aurelianensi quarto.

PROVINCIA VIENNENSIS, QVÆ ET VIENNENSIS PRIMA.

VIENNA Ptol. lib. 2. cap. 10. vulgò *Vienna*. Dicitur Galliae Metropolis eximia cum Lugduno, apud Euseb. libro 5. hist. Eccles. cap. 1. *Mamertius* Viennensis Episcopi meminit Greg. Turon. lib. 2. hist. cap. 34. & *Verus* subscripsit Concilio Arelateni primo.

GENEVA Cæsari lib. 1. de bello Gallico, vulgò *Geneue*. Ex eius Episcopis *Maximus* subscripsit Concilio Epaonensi, & *Pappulus* Aurelianensi quinto.

GRATIANOPOLIS Sidon. Apoll. lib. 3. epist. 14. vulgò *Grenoble*. *Dominus* huius Episcopus nominatur inter Episcopos Galliae Legatos ad Concilium Aquileiense missos, & *Victorius* subscripsit Epaonensi.

CIVITAS ALBENSIVM Notitiæ Prouinciarum & ciuitatum Galliae sub Honorio factæ. Quibusdam creditur diruta, & ex ea sedes Episcopalis Viuariam urbem proximam translata: sed alijs eadem cum Viuaria, hisque fauere videntur Notitia perantiqua Thuana, pluresque aliæ vetustæ, quibus sic legitur in descriptione Prouinciæ Viennensis: [Ciuitas Albensium Viuaria.] *Venantius* Albensis Episcopus subscripsit Concilio Epaonensi, & postea idem vel alter *Venantius* Viuariensis Episcopus dicitur in Concilio Aruernensi.

VALENTIA colonia Ptol. lib. 2. cap. 10. vulgò *Valence*. *Emilianus* huius Episc. subscripsit Concilio Valentino primo, & *Apollinaris* Epaonensi.

MAVRIANA Notitijs antiquis Ecclesiasticis Galliae, urbs in Valle ad Alpes Cottias, in qua Ciuitas S. Ioannis Maurianensis dicta, vulgò *S. Jean de Maurienne*. *Hiconius* Maurianensis Episcopus subscripsit Concilij Matisconensi primo & secundo.

IN ALPIBVS GRAIIS, SEV PENNINIS.

DARANTASIA Anton. in Itiner. vulgò *La Tarantaise*. Ex eius Episcopis *Sanctus* subscripsit Concilio Epaonensi, & *Martianus* Matisconensi I.